

SAMOA

Faatulagaina o Aiaiga

VAEGA I FAATOMUAGA

1. Igoa puupuu ma le amataga
2. Faamatalaina o uiga o upu
3. E leai se moliaga mo so o se soligatulafono mo tagata e i lalo ifo o le 10 tausaga le matutua

VAEGA II FAAMASINOGA MO TUPULAGA TALAVOU

4. Faavaeina o le Faamasinoga mo Tupulaga Talavou
5. Puleaga a le Faamasinoga mo Tupulaga Talavou
6. Tualumaga a le Faamasinoga mo Tupulaga Talavou
7. E mafai e le Faamasinoga mo Tupulaga Talavou ona manaomia le auai atu o matua
8. O le a le avanoa i tagata lautele ma vaega faasalalau mataupu e faasino i le

Faamasinoga mo Tupulaga Talavou

9. Aia tatau a se Tagata Talavou

VAEGA III VAEGA O AUAUNAGA TAU NOFO VAAVAAIA

10. Matafaioi a le Vaega o Auaunaga Tau Nofo Vaavaaia

VAEGA IV FONOTAGA A O LUMANAI SE FAAIUGA TAU FAASALAGA

11. Ia faia fonotaga a o lumanai se faaiuga tau faasalaga e pei ona faatonuina e le Faamasinoga
12. Faamoemoega o fonotaga a o lumanai se faaiuga tau faasalaga
13. Ia iloiloina taiala faavae i fonotaga a o lumanai se faaiuga tau faasalaga

14. Ia faamauina e le Vaega o
Auaunaga Tau Nofo
Vaavaaia taualumaga o se
fonotaga a o lumanai se
faaiuga tau faasalaga

VAEGA V
FAASALAGA O TUPULAGA
TALAVOU

15. O auala e mafai ona
faasalaina ai e le
Faamasinoga
16. Faasalaga

VAEGA VI
LAPATAIGA MA
LAPATAIGA ALOAIA A
LEOLEO

17. Iloiloga o se lapataiga e suia
ai se moliaga

18. Lapataiga aloaia a leoleo
19. Faasilasilaga o lapataiga po o
lapataiga aloaia a leoleo
20. E mafai e le Komesina ona
faalēaogāina le lapataiga ma
molia le Tagata Talavou
21. Faamatalaga molimau o
lapataiga ma lapataiga aloaia
a leoleo ma soligatulafono e
faasino i ai ia e lē taliaina i
taualumaga faasolitulafono

VAEGA VII
AIAIGA ESEESE

22. Tatalaina i tua ma le taofia i
le falepuipui
23. Tulafono Faatonotonu
24. Talosaga e faasaga i faaiuga
25. Soloia

2007, Nu. 25

O SE TULAFONO e aiaia ai se auala faafoe mo faamasinoga tau solitulafono mo Tupulaga Talavou, le faiga o i latou ma a latou mataupu e faamasinoga, faapea ma faamoemoega e faasino i ai.

[29 Oketopa 2007]

UA FAIA e le Fono Aoao Faitulafono a Samoa i totonu o le Palemene ua potopoto e faapea:

VAEGA I
FAATOMUAGA

1. Igoa puupuu ma le amataga-(1) E mafai ona taua lenei Tulafono o le Tulafono mo Tupulaga Talavou Solitulafono 2007.

(2) O lenei Tulafono e tatau ona amata faamamaluina i le aso e tuuina i ai le maliega a Le Ao o le Malo.

2. Faamatalaina o uiga o upu – I totonu o lenei Tulafono, ae vagana ai e ese se faamoemoe o lo o taua i le mataupu:

“tagata matua” o lona uiga o so o se tagata ua 17 tausaga po o le sili atu lona matua;

“faaleleiga” o lona uiga o so o se faaleleiga faale-aganuu lea ua tau fai malilie uma i ai vaega e faasino i se mataupu na feeseeseai ai;

“moliaga” o lona uiga o so o se faamatalaga, faamatalaga aloaia o ni tuuaiga, tusi poloaiga po o isi ituaiga o solitulafono tau soligatulafono ua faia e faasaga i se tagata;

“Faamasinoga” o lona uiga o le Faamasinoga mo Tupulaga Talavou ua faavaeina i lalo o le fuaiupu 4;

“Matagaluega” o lona uiga o le Matagaluega o Faamasinoga ma Pulega tau Faamasinoga;

“alii ofisa e vaavaaia” o lona uiga o se alii ofisa e vaavaaia ua tofia i le Vaega o Auaunaga Tau Nofo Vaavaaia;

“Tagata Talavou” o lona uiga o so o se tagata ua 10 tausaga po o le sili atu ma e i lalo ifo o le 17 tausaga lona matua;

“Faamasinoga mo Tupulaga Talavou” o lona uiga o le Faamasinoga ua faavaeina i lalo o le fuaiupu 4.

3. E leai se moliaga mo so o se soligatulafono mo tagata e i lalo ifo o le 10 tausaga le matutua – E ui lava i so o se isi tulafono e ese ai, e leai se tagata i lalo ifo o le 10 tausaga le matua e tatau ona molia i so o se solitulafono tau soligatulafono.

VAEGA II

FAAMASINOGA MO TUPULAGA TALAVOU

4. Faavaeina o le Faamasinoga mo Tupulaga Talavou-(1)

O le a i ai se vaega o le Faamasinoga Faa-itumalo e taua o le “Faamasinoga mo Tupulaga Talavou” o le a taitaia e Faamasino o le Faamasinoga Faa-itumalo.

(2) E mafai ona faafoeina i se ala e ogatasi ma tu ma aganuu a Samoa ia taualumaga i le Faamasinoga mo Tupulaga Talavou pe afai e talafeagai ai i le fuafuaina e le Faamasinoga.

(3) I le noatia ma le fai fuafua i le faafuaiupu (4), o taualumaga i le Faamasinoga mo Tupulaga Talavou o le a faafoeina i le gagana Samoa, seia vagana ai pe afai o le uluai gagana a le Tagata Talavou o se isi gagana e ese mai i le gagana Samoa, ma i lea tulaga, o le gagana e ao ona faaaogāina o le gagana Peretania.

(4) Afai e lē tautala i le gagana Samoa po o le gagana Peretania le Tagata Talavou, e tatau pe afai e mafai ona tuuina atu se faaliliupu i le gagana o lo o faaaogāina e le tagata solitulafono.

5. Puleaga a le Faamasinoga mo Tupulaga Talavou-(1) I le noatia ma le fai fuafua i le faafuaiupu (3), o so o se moliaga faasolitulafono ua faia faasaga i se Tagata Talavou, e tatau ona faataatia i le Faamasinoga mo Tupulaga Talavou ma o le fofogaina o moliaga taitasi o le a faia e tusa o aiaiga o lenei Tulafono.

(2) O so o se Tagata Talavou ua molia i se solitulafono tau soligatulafono, e ao ona tagofia lana mataupu e tusa ai ma aiaiga o lenei Tulafono.

(3) E tatau ona faataatia i luma ma ia tagofia e le Faamasinoga Sili, se moliaga o le fasioti tagata e faasaga i se Tagata Talavou.

6. Tualumaga a le Faamasinoga mo Tupulaga Talavou-(1) E tatau ona faaaogāina e le Faamasinoga mo Tupulaga Talavou, le tulaga faataatia ua faamaonia faasolitulafono i le faafoega o le mataupu ua i luma o le Faamasinoga, peitai e mafai i se isi faiga e ese ai ua fuafuaina ai ana lava taualumaga, vagana ai pe afai e tatau i le Faamasinoga ona faaaogā tulafono laiti o taualumaga faasolitulafono i faaiuga e teena ai.

(2) Afai ua lē ioe se Tagata Talavou i so o se moliaga, e tatau i le Faamasinoga ona faia o se taualumaga e fofogaina ai se tetee i se taimi vave e mafai ai.

(3) E mafai e le Faamasinoga ona faalēaogāina so o se moliaga pe afai ua faamalieina le Faamasino e faapea, o le taimi ua tuana'i ai le va o le aso na faia ai le soligatulafono ma le fofogaina o le Faamasinoga sa faatuai i se tulaga le talafeagai.

(4) Afai ua ioe se Tagata Talavou i so o se moliaga, e ao i le Faamasinoga ona faatonuina le Vaega o Auaunaga Tau Nofo Vaavaaia ina ia fuafua se fonotaga a o lumanai se faaiuga o se faasalaga, e tusa ai ma le Vaega IV o Ienei Tulafono, seia vagana ua fautuaina le Faamasinoga e faapea, a o lumanai le faataatiaga o se moliaga, sa i ai se fonotaga sa faia muamua lea sa tulai mai ai se faaleleiga, ma i le manatu o le Faamasinoga ua talafeagai lea ma tonu po o pe afai ua manatu le Faamasinoga o sea fuafuaga ua le talafeagai i tulaga ua aliae mai ma e mafai e le Faamasinoga i mataupu faapea, ona faasala loa le Tagata Talavou e tusa ai ma le fuaiupu 15.

(5) E mafai e le Faamasinoga ona tuuina atu se Tagata Talavou i le Faamasinoga Sili, pe afai i le manatu o le Faamasino e faatautaia le faamasinoga, o le soligatulafono e matuia ma o tulaga aliae mai o le Tagata Talavou ua alagata ai ona faia suesuga o lea Tagata Talavou e faapei o se tagata matua.

(6) E mafai e le Faamasinoga ona tuuina atu se Tagata Talavou i le Faamasinoga Sili mo le faasalaina, pe afai i le manatu o le Faamasino e faatautaia le faamasinoga, o le soligatulafono e matuia ma o tulaga aliae mai o le Tagata Talavou ua alagata ai ona faasala lea Tagata Talavou e faapei o se tagata matua.

(7) Afai o se Tagata Talavou ua molia faatasi o ia ma se tagata matua, ma ua faailoa lo la tetee i le moliaga, e mafai e le Faamasinoga, pe afai o le mea tonu lea ia faapea ona fai, ia tuuina atu le Tagata Talavou mo le fofogaina o le Faamasinoga i le Faamasinoga lava lea o lo o suesueina ai le tagata matua sa o la faia faatasi le soligatulafono.

7. E mafai e le Faamasinoga mo Tupulaga Talavou ona manaomia le auai atu o matua-(1) E mafai e le Faamasinoga ona tuuina atu se tusi poloaiga e manaomia ai matua, se matua po o se tagata ua aloaia faaletulafono e tausia se Tagata Talavou ina ia tulai i luma o le Faamasinoga ma e mafai ona tuuina atu

so o se fesili i le matua po o matua po o Lē ua faamaonia faaletulafono e tausia, ma e ono manaomia sea fesili ina ia taliina i lalo o se tautoga.

(2) Afai ua le oo mai i luma o le Faamasinoga mo Tupulaga Talavou se matua po o Lē ua faamaonia faaletulafono e tausia, ae ua uma ona valaauina i se tusi valaau ina ia oo mai, e mafai e le Faamasinoga ona tuuina atu se tusi poloaiga e aumai ai i luma o le Faamasinoga le matua po o Lē ua faamaonia faaletulafono e tausia, ma o sea tusi poloaiga ia faatinoina e se Leoleo.

8. O le a le avanoa i tagata lautele ma vaega faasalalau mataupu e faasino i le Faamasinoga mo Tupulaga Talavou-(1) O so o se taualumaga e faafoeina i totonu o le

Faamasinoga mo Tupulaga Talavou o le a le avanoa i tagata lautele ma le vaega faasalalau seia vagana ai ua fuafuaina e le Faamasinoga se isi faiga e ese ai.

(2) Ae vagana ai ua manatu le Faamasinoga e faapea, o lo o manaomia mo le manuia o tagata lautele, e lē mafai ona lomina faasalalau le igoa ma faamatalaga auiliili o se Tagata Talavou e le vaega faasalalau po o so o se isi tagata.

(3) O le igoa ma faamatalaga auiliili o so o se tagata ua afaina o lo o aafia ai i se soligatulafono lea o lo o molia ai se Tagata Talavou, e lē tatau ona lomina faasalalau e le vaega faasalalau po o so o se isi tagata.

(4) So o se tagata, tagata o vaega o faasalalauga, faalapotopotoga o vaega o faasalalauga, ofisa o vaega o faasalalauga po o pulega o vaega o faasalalauga, ua lomina faasalalau po o ua faia se auala e lomina faasalalau ai so o se faamatalaga po o se lomiga faasaina e lenei fuaiupu, ua faia se soligatulafono ma e tatau ona noatia i se moliaga ua faamaonia faaletulafono i se sala tupe e lē silia le 100 iunite tau faasalaga.

9. Aia tatau a se Tagata Talavou – E agavaa se Tagata Talavou i le:

- (a) mauaina o fautuaga saoloto faaletulafono; ma
- (b) le auai o lona matua ma/po o Lē o tausia o ia po o so o se sui o lona aiga, i le fofogaina o taualumaga pe afai e mafai ona faia faapea; ma
- (c) talosaga mo se loia fesoasoani.

VAEGA III**VAEGA O AUAUNAGA TAU NOFO VAAVAIA**

10. Matafaioi a le Vaega o Auaunaga Tau Nofo Vaavaaia – I le fofogaina o so o se tualumaga i totonu o le Faamasinoga mo Tupulaga Talavou, o le Vaega o Auaunaga Tau Nofo Vaavaaia o le a nafa ma:

- (a) le taloina ma le lipotia o so o se fonu a o lumanai se faaiuga tau faasalaga lea e faia mo faamoemoega o so o se tualumaga e oo mai i luma o le faamasinoga; ma
- (b) le mataituina o le faatinoga o so o se maliega e vaega auai i se fonu a o lumanai se faaiuga tau faasalaga, lea e maua ai se maliega mai le fonu; ma
- (c) le tuuina atu o se lipoti i le Faamasinoga faatasi ai ma se fautuaga i luga o le ituaiga ma faamatalaga auiliili o so o se faasalaga ua fuafuaina lea e manaomia ai e le Faamasinoga le Vaega o Auaunaga Tau Nofo Vaavaaia ina ia faia faapea; ma
- (d) mo le mataituina o so o se maliega ua taunuu i ai i le fonu a o lumanai se faaiuga tau faasalaga, le vaavaaia, faasalaga i galuega fai mo vaega o tagata lautele po o se suiga e mafai ona faaeina atu i se Tagata Talavou; ma
- (e) le faamautinoaina o le faataunuaina lelei o so o se faasalaga po o se manaoga o se Tagata Talavou.

VAEGA IV**FONOTAGA A O LUMANAI SE FAIUGA TAU FAASALAGA**

11. Ia faia fonotaga a o lumanai se faaiuga tau faasalaga e pei ona faatonuina e le Faamasinoga-(1) Afai ua ioeina e se Tagata Talavou lona faia o se soligatulafono po o pe afai ua faamaonia e le Faamasinoga se soligatulafono e faasaga i se Tagata Talavou, e mafai e le Faamasinoga ona faatonuina le Vaega o Auaunaga Tau Nofo Vaavaaia ina ia fuafuaina se

fonotaga a o lumanai se faaiuga tau faasalaga, lea e ao ona faia a o le i maea le 31 aso mai le aso na tuuina atu ai le faatonuga a le Faamasinoga i le Vaega o Auaunaga Tau Nofu Vaavaaia.

(2) O so o se fonotaga a o lumanai se faaiuga tau faasalaga na faatonuina e le Faamasinoga ina ia faia, o le a faafoeina e tusa ai ma tu ma aganuu a Samoa ua manatu le alii ofisa e vaavaaia ua talafeagai po o e pei ona faatonuina e le Faamasinoga.

(3) E mafai e so o se tagata ona auai i so o se fonotaga a o lumanai se faaiuga tau faasalaga na taloina, pe afai ua faamaonia e le alii ofisa e vaavaaia. O i latou e auai e mafai ona aofia ai so o se tagata ua afaina ma ni sui o lona aiga, o leoleo, o nisi o le Vaega o Auaunaga Tau Nofu Vaavaaia, ni sui o le nuu po o le ekalesia faatasi ai ma sui o le aiga o le Tagata Talavou o aafia.

(4) O so o se tagata ua faamaonia e le Tagata Talavou ma lona aiga i le fonotaga a o lumanai se faaiuga tau faasalaga, e mafai ona avea ma sui o le Tagata Talavou i totonu o le fonotaga.

12. Faamoemoega o fonotaga a o lumanai se faaiuga tau faasalaga-(1) O so o se fonotaga a o lumanai se faaiuga tau faasalaga e ao ona:

- (a) talanoaina tulaga na aliae mai i le soliga o le tulafono; ma
- (b) saili manatu o i latou o lo o auai i le fono; ma
- (c) ia iloilo pe sa maua se faaleleiga po o isi faaiuga e vaega sa aafia ai.

(2) I totonu o lenei fuaiupu, e mafai ona aofia ai i le faaiuga, se tupe totogi i so o se tagata ua afaina mo se tau, meatotino ua leiloa, tupe faaalu i togafitiga faafomai e ona faatulai mai po o so o se isi lava tulaga talafeagai o mea ua leiloa ua mafatia ai le tagata ua afaina ona o gaioiga a le Tagata Talavou.

13. Ia iloilo ina taiala faavae i fonotaga a o lumanai se faaiuga tau faasalaga – O so o se faaiuga e fuafuaina i se fonotaga a o lumanai se faaiuga tau faasalaga e tataua ona amanaia ai taiala faavae ua taua e faapea:

- (a) le mafai ona tali atu o le Tagata Talavou mo le leaga ua faia; ma
- (b) le toe faaleleia o le olaga o le Tagata Talavou e aofia ai se suesuega o le tulaga talafeagai lelei o le nofoaga o lo o nofo ai i le taimi nei; ma
- (c) le auai o le aiga o le Tagata Talavou, le ekalesia, alii taua ma le nuu; ma
- (d) le pui puiga o tagata lautele; ma
- (e) le taliaina o manatu o le tagata ua afaina ma le toe faafoisia o le tulaga o Lē ua afaina ina ia tusa ai ma tu ma aganuu a Samoa;
- (f) le faatulagaina o se fuafuaga mo le toe faaleleia o le olaga o le Tagata Talavou ina ia avea ma tagata faatuatuaina i tiute tauave ma ia toe siitia ai lona tulaga aloaia, le iloa lelei o tu ma aga faale-atunuu ma lona malamalamaaga.

14. Ia faamauina e le Vaega o Auaunaga Tau Nofo Vaavaaia taualumaga o se fonotaga a o lumanai se faaiuga tau faasalaga-(1) I fonotaga taitasi uma a o lumanai se faaiuga tau faasalaga, e tatau i le Vaega o Auaunaga Tau Nofo Vaavaaia ona faamautinoaina le auai i taimi uma o se alii ofisa e vaavaaia, e tusia faamaumauga o faaiuga a le fonotaga.

(2) O so o se faamaumauga o se fonotaga a o lumanai se faaiuga tau faasalaga, i lalo o le faafuaiupu (1) e ao ona tuuina atu vave i le Faamasinoga mo Tupulaga Talavou a o le i tauaofia le Faamasinoga mo Tupulaga Talavou i lana tauaofiaga e sosoo ai, e uiga i le Tagata Talavou lea e faatatau i ai le faamaumauga tusinga.

(3) O so o se fuafuaga o se gaoioiga po o se faasalaga na fautuaina i le fonotaga a o lumanai se faaiuga tau faasalaga, pe faapefea ona tagofia se mataupu e faasino i se tagata talavou i se tulaga e aupito sili ona lelei, e ao ona faamaea i totonu o le ono (6) masina talu ona faasalaina e le Faamasinoga lea Tagata Talavou.

VAEGA V
FAASALAGA O TUPULAGA TALAVOU

15. O auala e mafai ona faasalaina ai e le Faamasinoga-(1) I le noatia ma le fai fuafua i le faafuaiupu (2) ma le faafuaiupu (3), pe afai ua silafia e le Faamasinoga se moliaga ina ia faamaonia e faasaga i se Tagata Talavou, e mafai, pe afai e talafeagai, ma e aunoa ma le faia o se moliaga, ona poloaia le Tagata Talavou i totonu o le ono (6) masina ina ia:

- (a) tauaveina ana noataga i lalo o so o se maliega autasi a le fonotaga a o lumanai se faaiuga tau faasalaga; po o
- (b) le faatinoina o se tuutuuga e galue ai mo tagata lautele ia lē silia le 100 itula, ma ia maea i totonu o le ono (6) masina; po o
- (c) le faatinoina o se iloiloga o manaoga ma le/po o se polokalame mo le toe faaleleia o le olaga, ia lē silia le umi e ono (6) masina.

(2) Afai i le manatu o le Faamasinoga e faapea ua lē mafai ona faatinoina e le Tagata Talavou noataga o le Tagata Talavou i lalo o le faafuaiupu (1) i totonu o le ono (6) masina, e mafai e le Faamasinoga ona faamaonia faaletulafono ma faasala le Tagata Talavou e tusa ai ma le fuaiupu 16.

(3) Afai i le manatu o le Faamasinoga e faapea e manaomia se moliaga ua faamaonia faaletulafono ma se faasalaga, ina ia tusa ai ma le faia o le amiotonu, i le tuanai ai o le iloiloga maeaea o tulaga uma na aliae mai o le soligatulafono, e mafai e le Faamasinoga ona faamaonia faaletulafono ma faasala le Tagata Talavou ina ia tusa ai ma le fuaiupu 16.

16. Faasalaga-(1) Afai ua fuafuaina e le Faamasinoga ina ia faamaonia faaletulafono ma faasala se Tagata Talavou i lalo o le fuaiupu 15(2) po o le (3), e mafai e le Faamasinoga ona:

- (a) faamaonia faaletulafono ma faasaoloto le Tagata Talavou; po o
- (b) le poloaia o le Tagata Talavou ina ia oo mai pe a valaauina i totonu o le 12 masina mo lona faasalaga; po o

- (c) le faaeina atu o se sala tupe i le Tagata Talavou; po o
 - (d) le poloaia e faapea ia faatino e le Tagata Talavou se faasalaga e galue ai mo tagata lautele; po o
 - (e) le poloaia o le Tagata Talavou ina ia faatino se faasalaga o le nofo vaavaaia; po o
 - (f) le faaeina atu o se faasalaga o le nofosala i le falepuipui, ma ia tuliina le faasalaga i se nofoaga mo tupulaga talavou po o pe afai e leai sea nofoaga e avanoa, o se falepuipui i luga o tuutuuga e faapea, faatoa mafaia lava e le Faamasinoga ona faaee atu se faasalaga e taofia ai i le falepuipui e avea o se faasalaga mulimuli lava e faia, ma i ni tulaga e aliae mai lea ua leai lava se isi faasalaga e talafeagai i ai.
- (2) Afai ua faaee atu e le Faamasinoga se faasalaga i lalo o le faafuiaiupu (1)(f) ma o le faasalaga e tuliina i totonu o se falepuipui, e ao ona tuueseeseina le Tagata Talavou mai pagota matutua.

VAEGA VI

LAPATAIGA MA LAPATAIGA ALOAIA A LEOLEO

17. Iloiloga o se lapataiga e suia ai se moliaga-(1) Afai e iloiloina e se Leoleo pe molia se Tagata Talavou mo se soligatulafono, e tatau i le Leoleo ona iloilo pe faamata ua lava le lapataia o le Tagata Talavou, ae seia vagana ai e lē talafeagai se lapataiga ona o le matuia o le soligatulafono, le natura ma le aofaiga o soligatulafono na faia i taimi ua tuanai e le Tagata Talavou faapea ma manatu o le tagata ua afaina.

(2) Afai e manatu le Leoleo e faapea ua lava le lapataia o le Tagata Talavou, o lene Leoleo e mafai ona ia lapataia le Tagata Talavou, pe fuafua e lapataia le Tagata Talavou e se isi Leoleo.

18. Lapataiga aloaia a leoleo-(1) Afai e fautuaina e le Komesina o Leoleo le tuuina atu o se lapataiga aloaia a Leoleo i le Tagata Talavou e tusa ai ma so o se soligatulafono ua tuuaia ai po o ua ioeina e faasaga i se Tagata Talavou, e mafai e se Leoleo ona lapataia loa le Tagata Talavou.

(2) E tatau ona faaaogāina aiaiga nei, e tusa ai o se lapataiga aloaia a leoleo ua tuuina atu i se Tagata Talavou:

(a) e tatau ona tuuina atu le lapataiga e se Leoleo, pe afai e mafai ona faatinoina ai; ma

(b) e tatau ona tuuina atu le lapataiga e se Leoleo ua umia le tulaga satini po o luga atu, po o pe afai e le o avanoa sea Leoleo, ia faia loa e se Leoleo aupito i maualuga le tulaga o lo o i ai i lea taimi; ma

(c) e ao ona tuuina atu le lapataiga a o auai ai:

(i) se matua po o se tagata e tausia faaletulafono po o se isi tagata o lo o ia vaaia le Tagata Talavou; po o

(ii) afai ua le mafai ona auai atu le matua o le Tagata Talavou po o le tagata o lo o vaaia faaletulafono le Tagata Talavou, o se tagata matua ua filifilia e le Tagata Talavou.

19. Faasilasilaga o lapataiga po o lapataiga aloaia a leoleo-(1) E ao i Leoleo taitoatasi uma ona tuuina atu se lapataiga i lalo o le fuaiupu 17 po o se lapataiga aloaia a leoleo i lalo o le fuaiupu 18, ona faatino i se taimi vave e mafai ai, ina ua tuanai ai le tuuina atu o lena lapataiga, ona tuuina atu se faasilasilaga tusitusia ua faamaotiina ai le soligatulafono e tusa ai o lea na tuuina atu ai le lapataiga po o le lapataiga aloaia a leoleo, ma le faamauina o le mea moni e faapea o se lapataiga po o se lapataiga aloaia a leoleo sa tuuina atu e tusa ai o lena soligatulafono, i le Tagata Talavou ma se matua po o Lē o lo o tausia faaletulafono po o se isi tagata o lo o ia tausia le Tagata Talavou.

(2) Afai e mafai, e tatau ona tuuina atu ia faasilasilaga taitasi uma i se gagana e mafai ona malamalama ai le Tagata Talavou ma le matua po o Lē o lo o tausia faaletulafono po o se isi tagata o lo o tausia le Tagata Talavou, ma o le Leoleo o lo o ia tuuina atu sea faasilasilaga, e ao ona ia faamatalaina le aafiaga o le faasilasilaga i le Tagata Talavou ma le matua po o Lē o lo o tausia faaletulafono le Tagata Talavou.

20. E mafai e le Komesina ona faalēaogāina le lapataiga ma molia le Tagata Talavou – E mafai e le Komesina o Leoleo i totonu o le 12 masina talu ona tuuina atu se lapataiga i lalo o le fuaiupu 17 po o se lapataiga aloaia a Leoleo i lalo o le fuaiupu 18, e ala i se faasilasilaga tusitusia ua ia sainia, ma tuuina atu i le Tagata Talavou, ona faalēaogāina le lapataiga po o se lapataiga aloaia a Leoleo, lea e mafai ai ona molia le Tagata Talavou i se soligatulafono lea na tuuina atu ai le lapataiga po o se lapataiga aloaia a Leoleo.

21. Faamatalaga molimau o lapataiga ma lapataiga aloaia a leoleo ma soligatulafono e faasino i ai ia e lē taliaina i taualumaga faasolitulafono – Afai, e tusa ai o so o se soligatulafono ua tuuaia ai ma ua tuuina atu ai se lapataiga po o se lapataiga aloaia a leoleo i se Tagata Talavou i lalo o le fuaiupu 17 po o le fuaiupu 18:

- (a) e lē tatau ona faailoaina i so o se taualumaga faasolitulafono e faasaga i lena Tagata Talavou, se faamatalaga e faasino i lena lapataiga po o lena lapataiga aloaia a leoleo; ma
- (b) e lē tatau ona taliaina se faamatalaga molimau o lena soligatulafono e sui i le moliaga, i so o se taualumaga faasolitulafono e faasaga i lena Tagata Talavou mo so o se isi lava soligatulafono.

VAEGA VII **AIAIGA ESEESE**

22. Tatalaina i tua ma le taofia i le falepuipui-(1) E mafai e le Faamasinoga ona tatala i tua se Tagata Talavou e ala i se puipuiga po o le taofia i le falepuipui.

(2) Afai o se Tagata Talavou ua taofia i le falepuipui, e tatau ona taofia lea Tagata Talavou i se nofoaga mo Tupulaga Talavou, po o afai e leai se nofoaga faapea o i ai, ia ave i le falepuipui po o se nofoaga e nofo ai e pei ona faatonuina e le Faamasinoga pe afai e mafai ona faia faapea.

(3) Afai o se Tagata Talavou ua taofia i le falepuipui i lalo o le faafuaiupu (2), e ao ona tuueseese le Tagata Talavou ma pagota matutua.

(4) E mafai ona tatalaina i tua e ala i se puipuiga se Tagata Talavou i luga o le tasi po o le sili atu o tuutuuga e faapea:

- (a) e ao i le Tagata Talavou ona nonofo faatasi ma se tagata po o vasega o tagata ua faamaoti mai; ma
- (b) e lē tatau i le Tagata Talavou ona fesootai ma tagata po o vasega o tagata ua faamaoti mai; ma
- (c) e ao i le Tagata Talavou ona usitaia vavao;
- (d) e ao i le Tagata Talavou ona auai i le aoga po o so o se isi lava nofoaga ua faamaoti mai; ma
- (e) e lē tatau i le Tagata Talavou ona i ai i se nofoaga ua faamaoti mai po o le i ai i totonu o vaega ua faamaoti mai o sea nofoaga;
- (f) e manaomia le Tagata Talavou ina ia lipoti atu i le Vaega o Auaunaga Tau Nofo Vaavaaia; ma
- (g) e tatau i le Tagata Talavou ona toe faafoi pepa malaga aloaia uma; ma
- (h) e lē tatau i le Tagata Talavou ona tagofia le ava malosi, fualaau faasaina po o le aveina o se taavale afi.

(5) Afai ua solia e se Tagata Talavou tuutuuga mo le tatalaina i tua i se puipuiga ua faaee atu i lalo o lenei fuaiupu, e mafai ona faia loa gaoioiga i lalo o le Tulafono o Tualumaga Tau Solitulafono 1972, e faasino i le solia o le tatalaina i tua e ala i se puipuiga.

23. Tulafono Faatonutonu-(1) E mafai e Le Ao o le Malo, i le faia i luga o le fautuaga a le Kapeneta, mai i lea taimi i lea taimi, ona faia ia tulafono faatonutonu e pei ona talafeagai pe alagatatau mo le faamoemoe o le faatinoina po o le faamamaluina atoatoa o aiaiga o lenei Tulafono.

(2) E aunoa ma le faatapulaaina o le tulaga lautele o le faafuaiupu (1), e mafai ona faia tulafono faatonutonu mo faamoemoega o -

- (a) le faatonuina o tualumaga i totonu o le Faamasinoga mo Tupulaga Talavou ina ia ogatasi ma tu ma aganuu a Samoa; ma

- (b) le faatonuina o taualumaga manaomia mo le faamoemoe o le faatinoina o fonotaga a o lumanai se faaiuga tau faasalaga i lalo o le Vaega IV; ma
- (c) le faatonuina o pepa faatumu mo tusi faamaonia, faasilasilaga, faamaoniga po o so o se isi mataupu o i lalo o lenei Tulafono; ma
- (d) le faatonuina o tulafono faafoe e faasino i le faafoega o so o se nofoaga mo tupulaga talavou; ma
- (e) le faatonuina o totofiguapauina e mafai ona totogi e tusa ai o so o se mataupu i lalo o lenei Tulafono; ma
- (f) le faia o soligatulafono ma faasalaga mo soliga o na soligatulafono e oo atu i se tulaga aupito maualuga o le 100 iunite tau faasalaga.

24. Talosaga e faasaga i faaiuga-(1) So o se Tagata Talavou ua faamaonia faaletulafono lona moliaga po o ua faasalaina i le Faamasinoga Faa-Itumalo e mafai ona ia talosaga i le Faamasinoga Sili e faasaga i lona moliaga ma/po o lona faasalaga.

(2) E mafai e so o se Tagata Talavou ua molia po o ua faasalaina i le Faamasinoga Sili ona talosaga i le Faamasinoga o Talosaga e faasaga i lona moliaga ma/po o lona faasalaga.

25. Soloia – Ua soloia fuaiupu 11 ma le 12 o le Tulafono o Solitulafono 1961.

O le Tulafono mo Tupulaga Talavou Solitulafono 2007 o lo o faafoeina e le Matagaluega o Faamasinoga ma Pulega tau Faamasinoga

**Lolomiina e le Failautusi o le Fono Aoao Faitulafono,
i le pule a le Fono Aoao Faitulafono.**